


BOSNA I HERCEGOVINA
FEDERACIJA BOSNA I HERCEGOVINA
TUZLANSKI KANTON
OPĆINA SAPNA
OPĆINSKO VIJEĆE

S A P N A



K O D E K S

PONAŠANJA IZABRANIH ZVANIČNIKA - VIJEĆNIKA
U OPĆINSKOM VIJEĆU SAPNA

SAPNA, JULI 2006. GODINE

Na osnovu člana 36. i 43. Statuta Općine Sapna („Službeni glasnik Općine Sapna“ broj 1/04) i člana 99. Poslovnika Općinskog vijeća Sapna („Službeni glasnik Općine Sapna“ broj 1/05), Općinsko vijeće Sapna na sjednici održanoj dana 10.07.2006. godine, usvojilo je:

K O D E K S

PONAŠANJA IZABRANIH ZVANIČNIKA - VIJEĆNIKA U OPĆINSKOM VIJEĆU SAPNA

I - OPĆE ODREDBE

Član 1.

Ovim Kodeksom utvrđuju se načela i standardi rada izabranih zvaničnika - vijećnika Općinskog Vijeća Sapna (u daljem tekstu: Vijećnici), kojih se trebaju pridržavati u vršenju svojih funkcija, a sve u cilju kvalitetnog ostvarivanja mandata u interesu svih građana općine Sapna.

Vijećnici su obavezni upoznati se sa odredbama ovog Kodeksa, kao i da ga promoviraju i primjenjuju u svakodnevnom vršenju svojih funkcija.

Svoja prava, dužnosti i odgovornosti vijećnici ostvaruju u skladu sa Zakonom, Statutom, Poslovníkom Općinskog vijeća i ovim Kodeksom.

Član 2.

Vijećnici su obavezni da svoje ponašanje i rad usklade sa odredbama ovog Kodeksa, te da svoje funkcije obavljaju isključivo u interesu građana, a sve sa svrhom da se obezbijedi povjerenje u lični i politički integritet vijećnika kao pojedinaca, ali i integritet Općinskog Vijeća Sapna.

II - PODRUČJE PRIMJENE

Član 3.

Ovaj Kodeks odnosi se na vijećnike Općinskog vijeća Sapna (u daljem tekstu: Vijeće).

Termin „Vijećnik“ označava osobu kojoj je neposrednim i tajnim izborima povjeren mandat lokalne vlasti.

Principi ponašanja ustanovljeni ovim Kodeksom primjenjivat će se tokom cijelog izbornog mandata.

III - OSNOVNI PRINCIPI PONAŠANJA

1. Definisanje principa i standarda rada u obavljanju funkcije

Član 4.

Vijećnici su obavezni u obavljanju svojih dužnosti u Vijeću i prema javnosti u cjelini, pridržavati se sljedećih principa i standarda:

1. Prioritet zakona i općeg interesa,
2. Integritet,
3. Nesebičnost,
4. Zabrana mita i korupcije,
5. Otvorenost i odnosi sa medijima,
6. Odgovornost,
7. Izbjegavanje sukoba interesa,
8. Pravilno upravljanje resursima,
9. Uzajamno poštovanje i uvažavanje,
10. Profesionalno usavršavanje,
11. Izbjegavanje kumulacije pozicija.

1.1. Prioritet zakona i općeg interesa

Član 5.

U svom djelovanju vijećnici će uvijek poštovati zakon i opći interes i svoje djelovanje usmjeriti ka njihovom ostvarivanju, i uvijek moraju biti svjesni činjenice da su izabrani predstavnici građana općine Sapna.

Sve akte u okviru svog djelovanja donosit će isključivo na način i po procedurama predviđenim propisima.

Ukoliko je vijećnicima poznato ili im nije moglo biti nepoznato da prijedlog za koji trebaju da glasaju, odnosno akt koji treba da donesu nije u skladu sa Ustavom, Zakonom ili podzakonskim propisima, javno će iznijeti svoj stav o tome i odbit će da glasaju za takav prijedlog odnosno da donesu takvu odluku

Prilikom pripremanja i donošenja općih akata, vijećnici će ukoliko je neophodno radi pravilne ocjene njegove svrsishodnosti, organizovanjem javnih panela, zborova građana, putem radnih sastanaka sa udruženjima građana i na druge dopuštene načine pribaviti mišljenje javnosti.

Vijećnici su dužni u okviru svojih ovlaštenja, nadležnosti i odgovornosti raditi na donošenju rješenja koja su najbolja za sve građane općine Sapna.

1.2. Integritet

Član 6.

U svom djelovanju vijećnici će se oslanjati isključivo na vlastita znanja, sposobnosti i vještine i uvijek će samostalno i odgovorno donositi odluke, imajući u vidu najbolji interes za sve građane.

U svom djelovanju vijećnici su samostalni i neće dozvoliti bilo kakav spoljni uticaj na ispoljavanje njihove volje prilikom raspravljanja i odlučivanja po pojedinim pitanjima iz nadležnosti Vijeća ili radnog tijela Vijeća. Vijećnici će djelovati nezavisno od bilo kakvih vanjskih uticaja ili pritisaka u pogledu načina glasanja ili zauzimanja stavova o pojedinim pitanjima iz nadležnosti Vijeća ili radnog tijela Vijeća.

Vijećnici kao pojedinci nisu međusobno odgovorni za svoje stavove, izraženo mišljenje ili glasanje po pojedinim pitanjima o kojima se raspravlja u Vijeću ili radnim tijelima, osim u slučajevima gdje se navodi kršenje obaveza utvrđenih Ustavom, Zakonom, Poslovníkom Općinskog vijeća i ovim Kodeksom.

Vijećnici će djelovati nezavisno od neprincipijelnih uticaja ili pritisaka od izvršnih organa općine ili općinske administracije u pogledu načina glasanja ili zauzimanja stavova o pojedinim pitanjima iz nadležnosti Vijeća ili radnog tijela Vijeća.

1.3. Nesebičnost

Član 7.

Izabrani zvaničnici će u svom djelovanju uvijek postupati u skladu sa općim interesom koji isključuje rad za finansijsku dobit ili bilo koju direktnu ili indirektnu korist za sebe ili lica iz svog privatnog okruženja izuzev naknada i nagrada za svoj rad utvrđenih odlukom Vijeća ili radnog tijela Vijeća .

1.4. Zabrana mita i korupcije

Član 8.

U obavljanju svojih funkcija vijećnici ne smiju primati ili davati neku naknadu, niti smiju obećavati nekome nagradu ili kakvu drugu korist. Vijećnici svoje funkcije vrše isključivo u javnom interesu, zanemarujući u potpunosti nagrade koje bi dobio u slučaju postupanja suprotnog općem dobru i javnom interesu.

Vijećnici ne smiju zloupotrebljavati svoj položaj kako bi omogućio bilo kakvu beneficiju u svoju korist ili korist svoje porodice.

Ovaj princip odnosi se i na svako drugo ponašanje koje bi se prema važećim propisima moglo podvesti kao aktivno ili pasivno podmićivanje.

1.5. Otvorenost i odnosi sa medijim

Član 9.

Vijećnici će u svom djelovanju i u vezi sa odlukama koje donose uvijek biti otvoreni i jasno i javno će saopštiti i obrazložiti vlastite stavove i razloge za sopstvene odluke i ponašanja.

Javnost mora biti upoznata sa radom vijećnika i vijeća kao cjeline te će stoga vijećnici putem sredstava javnog informisanja pošteno i u potpunosti saopštavati informacije o radu vijeća i dužnostima vijećnika.

Ovo se ne odnosi na davanje povjerljivih informacija i informacija o privatnom životu vijećnika ili trećih lica.

1.6. Odgovornost

Član 10.

U toku obavljanja svoje funkcije vijećnici će postupati u skladu sa propisanim procedurama i principima dobre uprave, nastojeći pri tome omogućiti nepristrasnost u odlučivanju koja isključuje svaki oblik diskriminacije, političke pripadnosti i nepotizma, a što sve doprinosi efikasnosti rada Vijeća.

Vijećnici su odgovorni za kreiranje i ostvarivanje politike javnih usluga i njihovo djelovanje usklađeno sa principima demokratije, časti i poštenja.

Odgovornost svakog vijećnika je individualna.

1.7. Izbjegavanje sukoba interesa

Član 11.

Zakon o sukobu interesa u institucijama Bosne i Hercegovine utvrđuje nespojivost funkcije vijećnika sa funkcijom odnosno položajem u lokalnoj upravi, državnom organu ili preduzećima, i vijećnici će se u svom cjelokupnom radu uvijek pridržavati odredbi ovog Zakona.

Vijećnici su također dužni pridržavati se i drugih zakona koji uređuju ovo pitanje.

Vijećnici su u svom radu obavezni poštovati zakone i sve druge propise kojima se određuju prava, obaveze i odgovornosti u obnašanju javnih dužnosti, i ne smiju svojim djelovanjem ugroziti povjerenje građana.

Ukoliko se razmatra određeni akt koji treba biti usvojen i po kojem bi vijećnik, njegovi srodnici ili prijatelji, ili pravni subjekti u kome on ima finansijski ili drugi interes, trebali da ostvare kakvu korist ili privilegiju, vijećnik će tokom rasprave prijaviti slučaj sukoba interesa, i neće se izjašnjavati prilikom odlučivanja o tom aktu.

Vijećnik će se uredno odazvati zahtjevu za prijavu podataka ili davanje informacija o funkcijama koje zauzima, zanimanju i promjenama u njegovoj imovini.

1.8. Pravilno upravljanje resursima

Član 12.

U svim slučajevima u kojim se raspravlja o prijedlogu odluke koja se odnosi na trošenje ili ulaganje finansijskih sredstava i imovinu općine u cjelosti, vijećnici će postupati sa posebnom pažnjom i odgovornosti, i nastojat će uvijek da svojim djelovanjem ne oštete građane i općinu.

Vijećnici neće na bilo koji način učestvovati u pripremanju ili donošenju nepravilnih odluka, koje bi mogle donijeti lične koristi ili ostvarenje privatnog interesa osobe sa kojom su povezani finansijskim ili bilo kojim drugim interesom .

Svojim djelovanjem ne smiju davati ni povoda ni podsticaj za donošenje takvih odluka.

1.9. Uzajamno poštovanje i uvažavanje

Član 13.

Svi vijećnici su obavezni da u međusobnim odnosima razgovaraju iskreno i sa poštovanjem uvažavajući svoje sagovornike, uz poštovanje ličnog dostojanstva ali i dostojanstva drugih.

Svaki vijećnik je obavezan da u javnosti istupi sa uvažavanjem i poštovanjem i da njeguje kulturu dijaloga.

U međusobnoj komunikaciji, ali i komunikaciji sa javnošću izbjegavat će se korištenje riječi ili izraza koji vrijeđaju ili omalovažavaju druge osobe ili grupe.

Vijećnici su obavezni prisustvovati sjednicama Vijeća ili tijela čiji su članovi i te obaveze se moraju strogo pridržavati.

Sjednicu ne smiju napuštati u toku ili prije završetka, a da prije toga ne saopšte javno ili predsjedavajućem Vijeća razlog napuštanja sjednice.

Ukoliko postoji opravdan razlog koji vijećnika sprečava da prisustvuje sjednici ili sastanku Vijeća na koje je uredno i blagovremeno pozvan, saopćit će predsjedavajućem vijeća taj razlog, a on će Vijeće ili radno tijelo Vijeća obavijestiti o razlogu izostanka Vijećnika.

Vijećnici će kad su u mogućnosti prisustvovati javnim manifestacijama ili javnim skupovima na koje su uredno pozvani u svojstvu Vijećnika.

1.10. Profesionalno usavršavanje

Član 14.

Kako bi što efikasnije obavljali svoje dužnosti, Vijećnici će samostalnim aktivnostima i prisustvom i učešćem na seminarima, savjetovanjima i svim drugim vidovima edukacije, obogaćivati i usavršavati svoja znanja i sposobnosti.

1.11. Izbjegavanje kumulacije pozicija

Član 15.

Vijećnik kao neposredno izabran predstavnik mora biti potpuno posvećen obavljanju svojih dužnosti, i neće prihvatiti imenovanja na druge pozicije koja bi negativno uticala na izvršavanje njegovih osnovnih obaveza.

Vijećnik će prihvatiti imenovanja na druge pozicije samo u onoj mjeri koja neće umanjivati njegove radne i druge sposobnosti za izvršavanje osnovnih dužnosti.

IV - SVEČANA IZJAVA

Član 16.

Nakon usvajanja Kodeksa ponašanja izabranih zvaničnika - vijećnika u Općinskom vijeću Sapna, vijećnici daju svečanu izjavu koja glasi: Ja _____ iz _____, Vijećnik u Općinskom vijeću Sapna, obavezujem se da ću se u cjelosti pridržavati Etičkog Kodeksa ponašanja izabranih zvaničnika - vijećnika u Općinskom vijeću Sapna.

Vijećnici koji na bilo kojim od narednih izbora budu izabrani na funkciju vijećnika, svečanu izjavu daju prilikom preuzimanja dužnosti.

V - PRAĆENJE PRIMJENE KODEKSA

Član 17.

Vijećnici će tokom svog cjelokupnog djelovanja pozivati i međusobno se podsjećati na primjenu Kodeksa.

Predsjedavajući vijeća će pratiti poštovanje i primjenu principa utvrđenih ovim Kodeksom i ovlašten je da u svakom momentu upozori vijećnike na obavezu ponašanja u skladu sa Kodeksom, kao i da preduzme druge mjere u skladu sa Poslovníkom o radu Općinskog vijeća i Kodeksom.

Član 18.

Vijećnik koji prekrši neku od odredbi ovog Kodeksa, biće podvrgnut utvrđivanju odgovornosti i izricanju sankcije, a po postupku propisanom ovim Kodeksom.

Svrha sankcionisanja je javna osuda neprihvatljivog ponašanja koje je u suprotnosti sa ovim Kodeksom, preventivni moralni uticaj na buduće vijećnike, kao i razvijanje društvene odgovornosti.

Sankcije koje se mogu izreći za povredu neke od odredbi ovog Kodeksa su:

- ukor,
- javni ukor sa objavljivanjem izvještaja i odluke i
- novčana kazna i kazna javnog ukora sa objavljivanjem izvještaja i odluke.

Novčana kazna izriče se u visini od 10% od mjesečne vijećničke naknade za period od 1 mjeseca.

Član 19.

Kako bi se obezbijedio nadzor nad primjenom odredbi ovog Kodeksa, Vijeće imenuje Komisiju za praćenje primjene Kodeksa ponašanja (daljem tekstu: Komisija), koja će donijeti Poslovnik o svom radu.

Komisija prati i analizira primjenu Kodeksa, razmatra prijavu, vodi istragu, predlaže sankcije, podnosi Vijeću izvještaj o radu (polugodišnje), obavještava javnost, djeluje savjetodavno, predlaže izmjene i dopune Kodeksa, obavlja i druge poslove u vezi sa primjenom ovog Kodeksa.

Komisija ima 5 članova od kojih se 3 člana imenuju iz reda vijećnika, a dva se imenuju iz reda građana.

Odluke Komisije donose se većinom od ukupnog broja članova.

Član 20.

Svaki građanin i Vijećnik ovlašteni su da podnesu prijavu povrede Kodeksa, a u prijavi će obavezno navesti ime i prezime podnosioca prijave, radnje za koje smatra da su povreda Kodeksa, član Kodeksa koji je prekršen i dokaze kojima to potvrđuje.

Komisija ispituje osnovanost prijave, razmatra prijavu, provodi dokazni postupak i utvrđuje da li postoji povreda neke od odredbi ovog Kodeksa.

Ako Komisija utvrdi da nije bilo povrede Kodeksa, obavijestit će o tome podnosioca prijave, a Vijeće će o takvim slučajevima obavještavati svakih šest mjeseci.

U slučaju da Komisija utvrdi povredu ovog Kodeksa, za prvo naredno zasjedanje podnijet će Vijeću izvještaj sa preporukom o izricanju određene sankcije.

O vrsti i visini kazne Vijeće odlučuje na osnovu preporuke Komisije, osim ako Vijećnik priloži relevantne dokaze o nepostojanju povrede odredbi Kodeksa, ili dokaze o povredi postupka utvrđenog Kodeksom.

Član 21.

Kaznu ukora i javnog ukora sa objavljivanjem izvještaja i odluke izvršava predsjedavajući Vijeća saopštavanjem o izrečenoj kazni i razlozima izricanja takve kazne i dostavom primjerka odluke Vijećniku kome je kazna izrečena.

Kazna javnog ukora sa objavljivanjem izvještaja i odluke izvršava se objavljivanjem u „Službenom glasniku općine Sapna“ i na oglasnoj tabli općine Sapna.

Novčana kazna izvršava se tako što sekretar vijeća dostavlja odluku Vijeća nadležnoj službi za obračun vijećničkih naknada, koja će obezbijediti njeno izvršenje umanjnjem vijećničke naknade, u skladu sa tom odlukom, a sredstva ostaju u budžetu općine Sapna.

Član 22.

U toku rasprave o povredi odredbi ovog Kodeksa i glasanju radi izricanja sankcije, ne može se isključiti javnost.

O izrečenim sankcijama za povredu ovog Kodeksa sekretar Vijeća vodi urednu i ispravnu evidenciju.

VI - ZAVRŠNE ODREDBE

Član 23.

Utvrđivanje povrede ovog Kodeksa i izricanje i izvršenje sankcija utvrđenih ovim Kodeksom (ukor, javni ukor sa objavljivanjem izvještaja i odluke i novčana kazna) ne isključuje odgovornost vijećnika u skladu sa Zakonom o sukobu interesa ili drugim Zakonom, podzakonskim aktom i Poslovníkom Općinskog vijeća Sapna.

VII – OBJAVLJIVANJE

Član 24.

Vijećnici su dužni da svojim aktivnostima učestvuju u promociji ovog Kodeksa.

Član 25.

Ovaj Kodeks stupa na snagu osmog dana od dana objavljivanja u „Službenom glasniku Općine Sapna“.

Bosna i Hercegovina
Federacija Bosne i Hercegovine
Tuzlanski kanton
Općina Sapna
Općinsko vijeće

Broj: 01-02-665-8/06
Datum: 10.07.2006. godine

Predsjedavajući
Općinskog vijeća
Ćamil Ahmetović v.r.

